

VENDIM

Nr. 741, datë 23.11.2022

PËR PËRCAKTIMIN E PROCEDURËS DHE TË DOKUMENTACIONIT PËR KRIJIMIN E INSTITUCIONEVE TË ARSIMIT TË LARTË PUBLIK TË PAVARUR (IALPP)

Në mbështetje të nenit 100 të Kushtetutës dhe të pikës 7, të nenit 120, të ligjit nr. 80/2015, “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë”, me propozimin e ministrit të Arsimit dhe Sportit, Këshilli i Ministrave

VENDOSI:

1. Institucionet e arsimit të lartë (në vijim “IAL”), të cilat plotësojnë kriteret ligjore për t’u transformuar në institucione publike të pavarura të arsimit të lartë (në vijim “IALPP”), paraqesin kërkesën për transformim, ndërsa institucionet publike dhe subjektet e së drejtës private, në cilësinë e themeluesve, paraqesin kërkesën për krijimin e IALPP-së, sipas procedurave të përcaktuara në këtë vendim.

2. Themeluesi/t paraprakisht, për secilën kategori të IAL-ve, fillojnë procedurat e transformimit në IALPP, si më poshtë vijon:

a) vlerëson me ekspertë të licencuar pasuritë e luajtshme dhe të paluajtshme, ku do të zhvillojë veprimtarinë IALPP-ja dhe i kontabilizon me vlerën e tregut;

b) themelon fondacionin, sipas kuadrit ligjor në fuqi për organizatat jofitimprurëse, Kodit Civil dhe ligjit nr. 80/2015, “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë”;

c) përgatit dokumentacionin e nevojshëm të fondacionit të themeluar, sipas përcaktimeve të këtij vendimi për krijimin apo transformimin e IAL-së në IALPP dhe e paraqet në ministrinë përgjegjëse për arsimin, e cila pas vlerësimit teknik dhe ligjor të kërkesës, propozon në Këshillin e Ministrave krijimin e IALPP-së së propozuar;

ç) ndjek nëpërmjet portalit “*e-Albania*” procedurat e nevojshme dhe paraqet dokumentacionin, sipas përcaktimeve të kuadrit ligjor në fuqi.

3. Institucionet publike dhe subjektet e së drejtës private, në cilësinë e themeluesve, paraqesin për krijimin e IALPP-së dokumentacionin, si më poshtë vijon:

a) kërkesën për themelimin e IALPP-së, e cila duhet të përmbajë emrin dhe objektivat afatgjatë të veprimtarisë arsimore, kërkimore dhe zhvilluese të institucionit;

b) aktin e krijimit dhe statutin e fondacionit, shoqëruar me vendimin e gjykatës kompetente;

c) vendimin e Bordit të Fondacionit për themelimin e IALPP-së;

ç) të dhënat për burimet financiare dhe gjendjen financiare, e cila duhet të garantojë zhvillimin e veprimtarisë së IAL-së, për të paktën 3 (tre) vjet akademikë;

- d) planin e zhvillimit të IAL-së për 5 (pesë) vjetët e ardhshëm;
- dh) raportin e auditimit financiar nga auditues të jashtëm, referuar nenit 116, të ligjit nr. 80/2015;
- e) raportin e vlerësimit të pasurive të luajtshme dhe të paluajtshme në administrim, pronësi apo posedim;
- ë) organizimin akademik dhe administrativ të IALPP-së, si dhe dokumentacionin ligjor për personelin akademik dhe administrativ, sipas kërkesave të kuadrit ligjor në fuqi;
- f) organizimin e programeve të studimit, planeve mësimore, programeve të lëndëve/moduleve të nënshkruara nga titullari i lëndës, jetëshkrimit të titullarit të lëndës, niveleve dhe emërtimeve të diplomave;
- g) strukturën e IAL-së (organigrama);
- gj) projektstatutin e IALPP-së;
- h) kontratat e punës për personelin akademik të punësuar dhe kriteret e punësimit për çdo vend pune në IAL;
- i) deklaratën për plotësimin e standardeve akademike;
- j) relacionin për infrastrukturën nga inxhinier i licencuar dhe relacionin për laboratorët e bibliotekat, bazuar në standardet shtetërore;
- k) numrin unik të identifikimit të subjektit (NUIS) për regjistrimin si person juridik, me aktivitet në fushën e arsimit.

4. IAL-të, që kërkojnë të transformohen në IALPP, kryejnë procedurat paraprake, si më poshtë vijon:

- a) administratori i IAL-së, së bashku me auditues të jashtëm, referuar nenit 116, të ligjit nr. 80/2015, bëjnë paraprakisht vlerësimin e pasurive të luajtshme dhe të paluajtshme, duke i kontabilizuar me vlerën e tregut. Shpenzimet për audituesin përballohen nga vetë IAL-ja;
- b) administratori i IAL-së, bazuar në pasqyrat financiare të 3 (tri) viteve të fundit, harton raportin e ecurisë financiare të institucionit, ku identifikon masën e financimit nga të ardhurat e IAL-së, e cila duhet të garantojë zhvillimin e veprimtarisë së IAL-së për të paktën 3 (tri) vite akademike;
- c) administratori harton planin e zhvillimit të IAL-së për 5 (pesë) vitet e ardhshme;
- ç) administratori i IAL-së paraqet për mendim në senatin akademik dokumentacionin për plotësimin e kriterëve të mësipërme dhe gjendjes financiare, si dhe propozimin për transformim të IAL-së në IALPP;
- d) në rast se mendimi i Senatit Akademik është pozitiv, atëherë Senati Akademik ia paraqet për vendimarrje Bordit të Administrimit;
- dh) Bordi i Administrimit shprehet brenda 1 (një) muaji për propozimin e administratorit. Vendimi i Bordit të Administrimit për transformim duhet të merret me tre të katërtat e votave të anëtarëve të tij;

e) në rast të një vendimi pozitiv për transformim nga Bordi i Administrimit, dokumentacioni dhe vendimi i paraqitet ministrit përgjegjës për arsimin;

ë) fondacioni i themeluar, sipas kuadrit ligjor në fuqi për organizatat jofitimprurëse, Kodit Civil dhe ligjit nr. 80/2015, përgatit dokumentacionin e nevojshëm për ngritjen e IALPP-së dhe e paraqet në ministrinë përgjegjëse për arsimin, e cila pas vlerësimit të dokumentacionit, sipas këtij vendimi dhe kritereve ligjore të përcaktuara në nenin 119, të ligjit nr. 80/2015, propozon në Këshillin e Ministrave krijimin e IALPP-së.

5. IAL-të, që kërkojnë të transformohen në IALPP, paraqesin dokumentacionin, si më poshtë vijon:

a) kërkesën për transformimin e IALPP-së, e cila duhet të përmbajë emrin dhe objektivat afatgjatë të veprimtarisë arsimore, kërkimore dhe zhvilluese të institucionit;

b) aktin e krijimit dhe statutin e fondacionit, shoqëruar me vendimin e gjykatës kompetente;

c) aktin e hapjes së IAL-së, aktin e akreditimit institucional dhe të të gjitha programeve të studimit;

ç) vendimin e Bordit të Fondacionit për themelimin e IALPP-së;

d) të dhënat për burimet financiare dhe gjendjen financiare, e cila duhet të garantojë zhvillimin e veprimtarisë së IAL-së, për të paktën 3 (tre) vjet akademikë;

dh) planin e zhvillimit të IAL-së për 5 (pesë) vjetët e ardhshëm;

e) raportin e auditimit financiar nga auditues të jashtëm, referuar nenit 116, të ligjit nr. 80/2015;

ë) raportin e vlerësimit të pasurive të luajtshme dhe të paluajtshme në administrim, pronësi apo posedim;

f) organizimin akademik dhe administrativ të IALPP-së, si dhe dokumentacionin ligjor për personelin akademik dhe administrativ, sipas kërkesave të kuadrit ligjor në fuqi;

g) organizimin e programeve të studimit, planeve mësimore, programeve të lëndëve/moduleve të nënshkruara nga titullari i lëndës, jetëshkrimit të titullarit të lëndës, niveleve dhe emërtimeve të diplomave;

gj) strukturën e IAL-së (organigrama);

h) projektstatutin e IALPP-së;

i) kontratat e punës për personelin akademik të punësuar, të paktën për 1 (një) vit akademik dhe kriteret e punësimit për çdo vend pune në IAL;

j) deklaratën për plotësimin e standardeve akademike;

k) relacionin për infrastrukturën nga inxhinier i licencuar dhe relacionin për laboratorët e bibliotekat, bazuar në standardet shtetërore;

l) numrin unik të identifikimit të subjektit (NUIS) për regjistrimin si person juridik, me aktivitet në fushën e arsimit;

ll) pasqyrat financiare për 3 (tre) vjetët e fundit;

m) deklaratën analitike për tatimin mbi të ardhurat dhe deklaratat e tatimit mbi të ardhurat nga burime të tjera, për 3 (tre) vjetët e fundit, sipas kuadrit ligjor përkatës në fuqi;

n) vërtetimet që themeluesit nuk janë palë të paditura në procese gjyqësore, që kanë të bëjnë me çështje thelbësore, të cilat lidhen me veprimtarinë e IALPP-së.

6. IAL-të jopublike, që kërkojnë të transformohen në IALPP, së bashku me dokumentet e përcaktuara në pikën 5, paraqesin edhe dokumentet, si më poshtë vijon:

a) dokumentin zyrtar të akreditimit për institucionet private, që zotërojnë një formë akreditimi në një shtet tjetër;

b) dokumentin zyrtar të bashkëpunimit, si dhe dokumentin zyrtar të akreditimit të institucionit bashkëpunues, nëse ka, në rast se institucioni parashikon të ofrojë programe studimi të përbashkëta me IAL-të e tjera, vendase apo të huaja;

c) kontratën tip që studenti lidh me IALPP-në, sipas akteve ligjore dhe nënligjore në fuqi;

ç) vërtetimet që themeluesit nuk janë të dënuar me vendim të formës së prerë për kryerjen e një vepre penale;

d) vërtetimin nga gjykata që IAL-ja ekzistuese nuk është në procedura falimentimi;

dh) vërtetimin nga prokuroria që personi juridik dhe (ose) përfaqësuesi i tij nuk janë në ndjekje penale.

7. Procedura për shqyrtimin e dokumentacionit për krijimin e IALPP-së apo transformimin e IAL-së në IALPP është, si më poshtë vijon:

a) dokumentacioni shqyrtohet, sipas rregullave të brendshme të ministrisë përgjegjëse për arsimin brenda 60 (gjashtëdhjetë) ditëve nga data e depozitimit të tij në portalin “*e-Albania*”. Në rast se konstatohen mangësi në dokumentacion, ministria përgjegjëse për arsimin i kërkon subjektit plotësimin e tyre, brenda afatit kohor prej 30 (tridhjetë) ditëve nga data e njoftimit. Në rast se dokumentacioni nuk plotësohet brenda këtij afati, konsiderohet që subjekti ka hequr dorë nga aplikimi dhe praktika arkivohet;

b) kur dokumentacioni është i plotë, sipas kërkesave të këtij vendimi, vijon procedura me vlerësimin e plotësimit të standardeve nga ekspertë të jashtëm, nga lista e miratuar nga Agjencia e Sigurimit të Cilësisë në Arsimin e Lartë, të cilët caktohen me urdhër të ministrit përgjegjës për arsimin. Numri i ekspertëve për vlerësimin paraparak institucional, tarifat që paguhen nga IAL-të, si dhe masa e pagesës së ekspertëve përcaktohen në vendimin nr. 109, datë 15.2.2017, të Këshillit të Ministrave, të ndryshuar;

c) ekspertët brenda 21 (njëzet e një) ditëve dorëzojnë raportin e vlerësimit në ministrinë përgjegjëse për arsimin. Në rastet kur dokumentacioni është i paplotë apo konstatohen mangësi/pasaktësi nga ekspertët, ministria përgjegjëse për arsimin njofton subjektin, i cili bën plotësimet e nevojshme brenda 21 (njëzet e një) ditëve nga marrja e njoftimit;

ç) nëse pas njoftimit, dokumentacioni nuk plotësohet nga subjekti brenda këtij afati, prezumohet që subjekti ka hequr dorë nga aplikimi dhe praktika arkivohet;

d) dokumentacioni me plotësime i depozituar nga subjekti i përcillet ekspertëve, të cilët brenda 15 (pesëmbëdhjetë) ditëve dorëzojnë raportin e rivlerësuar. Nëse vlerësimi dhe vendimi përfundimtar është pozitiv, ministri i propozon Këshillit të Ministrave hapjen e institucionit të arsimit të lartë.

8. IAL-të publike, të cilat transformohen në IALPP, sipas përcaktimeve në këtë vendim, kthejnë në buxhetin e shtetit të gjitha fondet buxhetore të përfituara dhe të pashpenzuara deri në atë moment.

9. Ngarkohen Ministria e Arsimit dhe Sportit dhe institucionet e arsimit të lartë për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR

Belinda Balluku